

Gvangjsih Minzcuz Bau

ganhhau: CN45-0036 B.2013 Nd.7 Ng.17 liggaeuq gveiqceih nienz ndwenloeg cocib

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3082期

《Bouxcuengh Dunghsij》Banjdembouj Saemjgauj Baez Daihngeih

《壮族通史》增订版第二次审稿会在首府南宁召开

Bonjbauq siusik (gicej Vangz Sinhyungz) 7 nyied 11~15 hauh, aen benhveijvei 《Cuenghhag Cungzshuh》 hai aen hoih saemjgauj baez daihngeih, saemjdingh 《Bouxcuengh Dunghsij》 banjdembouj. Swcigih Minzveij、Minzyijveij cujyin Luz Yenbenj 12 hauh banhaet bae gwnz hoih guh le cungyau gangviah. Cunghgoz Segohyen yozbu veijyenz Sij Ginhboh gyausou、Minzcuz Cuzbanjse fucungjbenhciz Vangz Fungyenj、Gvangjsih Segohyen fuyencangj Vangz Cwngh、Yinznanz Swngj Hoihcuenghhag fuveicangj Hoz Cwngdingz daengj conghyah yozcej rog gih caeuq doenghboux yozcej Cuenghhag ndaw gih gungh 22 vunz camgya haihoih. Haihoih geizgan, gyoengq conghyah yozcej caezsim yenzgiu damqra gij sawgauj 《Bouxcuengh Dunghsij》 bonj saw hungloet lizsij Bouxcuengh neix, vih caenh' itbough guh ndei hong dembouj bien ndei bonjsaw caez doxyaeng doxgyau.

Luz Yenbenj naeuz, angq hoh Bouxcuengh yenzgiu daegbied dwg 《Bouxcuengh Dunghsij》 yenzgiu fuengmienh aeundaej cingzcik moq.

Daihgya cungj rox, 《Bouxcuengh Dunghsij》 gaenq miz bonj nyuenz-banj 3 gienj he, seizneix yaek dembouj、coihbien gyahung daengz 8 gienj, neiyungz engqgya fungfouq, gijneix dwg cingzcik moq Cuengh-haggyaiq, caemh dwg cingzcik moq minzcuz yenzgiu yozgai aeundaej. Gij cingzcik moq neix doiq Gvangjsih caiqlij daengx guek daeuj gangj cungj miz yihi hungloet. De naeuz, Swcigih Minzveij Minzyijveij geij bi neix daeuj gyalai caeuq gyoengq conghyah yozcej daegbieg dwg Hoihcuenghhag daengj sedonz doxgap, lij yaek ciqaeu gij yenzgiu cwnzgzoj neix daeuj dingh ok mbanj cwngcwz, cauhsuk minzcuz. Baenzneix dou cix caenhrengz guh ndei geij fuengmienh hong baihlaj: It dwg song veij caenhrengz cihciz caemhcai hemq-heuh gyagiengz hong yenzgiu minzcuz cojyouq, daegbied dwg Cuenghhag yenzgiu; ngeih dwg muengh gyoengq conghyah yozcej youq guh Cuenghhag yenzgiu ndawde yawjnaek Vahcuengh Sawcuengh vwndiz; sam dwg song veij caenhrengz cihciz hong biensaw 《Bouxcuengh Dunghsij》; seiq dwg

lienndaemh oksaw Gvangjsih minzcuz yenzgiu conghyah yozcej conhciz; haj dwg guh gij hong Nungz Cigauh yozsuz yenzdauj; roek dwg gyagiengz caeuq yozgai doxgap dwg aen gihbwnj yenzcwz guhhong minzveij minzyijveij.

Ciuq gaisau, 《Bouxcuengh Dunghsij》 banjdembouj youq bi 2008 cingqsiik doenghhong bouj bien, bi 2011 ndwen 5 guhsat baez saemjgauj daih' it, guj ndaw bineix guhsat baez saemjgauj daihngeih; banjdembouj youz nyuenz swcigih fucuzsiz Cangh Swnghecin dang cungcujbenh, miz 5 baux conghyah mizmingz dang guvwn, 10 lai baux Cuenghhag conghyah guh yozsuz aeundaej cingzcik ndei haenx dang baux cujbenh roxnaeuz bauxsij gak gienj. Ginggvaq roengzrengz guh gyawj cib bi seizgan, biensij le 300 fanh cih sawgauj. Mbat hoihsaemjgauj neix yaek saemj daujlun、yenjgij seizdaih、sangguj seizdaih、gingoz seizdaih、dujswh seizdaih 5 gienj; daengz ndwen 10 caiq saemj gihmiz seizdaih、gaenhdaih、minzcuz gihyiz swci seizdaih 3 gienj dem, daengx bonj saw daengz bimoq couh ndaej oksaw fathengz lo.

SIUSIK DINJ

简讯

● 7 nyied 9 hauh, dwg lig-gaeuq loeg nyied co' ngeih, Yungz-suij Myauzcuz Swciyen Bwzyinz Yangh Baujgyangh Cunh gawjbanh cietlumhbya. Dangdieg Myauzcuz、Dungcuz、Yauzcuz daengj saujsu minzcuz ginzcong comz daengz henz rij, angqyangz youh nauhyied dwk camgya lumh bya、ciengj bya hozdung.

(Danz Gajhinhg)

● 7 nyied 7 hauh banhaet, doenghboux gunghsanghyaiq dwg vunz Dagingz Cunh haenx "lajmbanj cinghseuq" hozdung gien cienz yizsi youq Yungzanh Yen Sanhyouj Muzyez Youjhan Gunghswh gawj-hengz. 16 baux gunghsanghyaiq dwg vunz Dagingz Cunh haenx doxcomz youq gizhaenx, vih mbanjranz cinghseuq hozdung okrengz.

(Veiz Cujswz Dwng Lingnaz)

● 7 nyied 6 hauh, Dunghlanz Yen Sanhlung Yauzcuz Yangh gyoengq beixnuengx Yauzcuz comz daengz Sanhhoz Cunh gvaq ngoenzciet conzdungj Yauzcuz. Dangdieg baijcuozsoj gaemdawz aen gihvei neix, bienguh caemhcai yaenq gij fwen auw faplwd fazgevihi cihsih guh neiyungz haenx 30 lai souj, fat hawj gyoengq Yauzcuz youq yienhciegz, linghvaih bienbaiz le fazci cezmuzy yienjok camgya hozdung, hawj engq lai vunz rox mizgven faplwd.

(Lanz Dunghyin)

● Daengz 6 nyied daej, Dwzbauj Yen caizcwnz souhaeuj gyoepsuenq ndaej 46588 fanh maenz, guhsat gij yinvu buenq bi gonq youz baihgwnz dingh haenx 109.62%, doengzbeij demsou 206 fanh maenz, demhwnj 0.44%; gunghgung caizcwnz yawhsuenq souhaeuj 33503 fanh maenz, doengzbeij demsou 6478 fanh maenz, demlai 23.97%.

(Nungz Yungjfang)

● 1 daengz 6 nyied, Nazboh Yen gyoepsuenq fat haeux bangbouj vunzungzhoh lajmanj haenx 273208 goenggaen、youzgwn 4961 goenggaen, coengh ginzcong gungz-hoj 9528 hoh 22173 vunzbaez.

(Maj Yungj)

Lungzswng: Hungzyauz "Ciet Dak Ndangdaenj" Yinx Hekyouz



龙胜:红瑶“晒衣节”引游人

7 nyied 13 hauh (liggaeuq loeg nyied coloeg), dwg ngoenzciet conzdungj heuhguh "ciet dak ndangdaenj" Lungzswng Gak Cuz Swciyen Hozbingz Yangh Mbanjginhgwngh Yauzcuz gvaq haenx. Ngoenzhaenx, gyoengq mehmbwk Hungzyauz hai sieng hai gvih, dawz gak yiengh ndangdaenj Yauzcuz daeuj dak, hawj ndangdaenj cawz mwt bae heiq. Doengzseiz, vunz Hungzyauz dangdieg daenj ndangdaenj ndei vih hekyouz byaujyenj le Hungzyauz coux bawxmoq、fouxlungz、dingj faexsawx daengj buek hozdung gig miz conzdungj minzcuz daegsaek haenx, yinx le gyawj fanh baux hekyouz ndaw guek rog guek nem baux gyaenz ingtsiengq. Ndaw doz dwg vunz Hungzyauz dangdieg cingq byauj-yenj fouxlungz.

(Veiz Gizyangz ingj)

Yungzsuij: 73 Bi Myauzcuz Dangjyenz Daiq Ginzcong Dajndaem Maenzgex Baenzfouq

融水: 73 岁苗族老党员带领群众培育伏苓致富

Dungj Siveih, bineix 73 bi, 1970 nienz camgya Cunghgoz Gungcanj-dangj, haeujdangj ndaej 40 lai bi, seizneix dwg Cunghgoz Gungcanj-dangj Yungzsuij Myauzcuz Swciyen Yanghfwnj Yangh Sinhbingz Cunh Dangjihbu baihlaj baux faenbough suhgi he.

Gaenh bi daeuj, de leihyungh doenghgij faexcoengz goz、ngeih

gocoengz daeuj ung maenzgex, daiqlingx 10 lai hoh Myauzcuz ung maenzgex, laebbaenz maenzgex dajndaem conhyez hozcozse, neix hawj moix hoh bingzyaenz souhaeuj 3 fanh lai maenz, Dungj Siveih swheij moix bi souhaeuj 5 fanh lai maenz.

Ciuq cam rox, aen yienh neix daengx yienh miz 170 hoh dajndaem maenzgex, bi cungjcanjlieng 170 lai

dun, cungjsouhaeuj 100 lai fanh; maenzgex, ciengzbaez Vahgun heuh-guh yinzlingz、sunghlingz、fuzlingz, dwg cungj raet siengz youq gwnz faexcoengz, yiengh lumj lwgmaenz, gyamq ndaem aeuj, baihndaw hau roxnaeuz meiq, dwg cungj ywdoj hung vunzraeuz ndaem haenx.

(Liu Swjyenh)